

四庫全書

集部

欽定四庫全書

太倉稊米集卷三十四

宋 周紫芝 撰

詩四十七首

次韻季共蓬齋夜坐三首

幽人懷故鄉夜坐聽秋雨耿耿不成寐悽悽亦良苦酒
白應自斟茶甘為誰煮喜意入寒燈詩成看花吐樂飢
焰短藥玉蟲綴釵股當亦念衰翁秋風卧何許

二

寒齋秋意高夜久羣籟息眼前無一塵誰與共此席平生樂虛曠頗怪言不食遙知高世意仰面看屋脊秋蟲曾何知悲鳴亂胸臆君亦意不眠佳月良可惜

三

露井飛彫梧碧月借秋色頗聞遭鼠輩惱睡成反側君豈効鼠手姑緩藁街磔我亦見事慣流年反多歷誰能與此物更較勝負敵一笑謂狸奴無乃爾不職

讀韋莊浣花集戲題二詩

春風吹縞一池波
付與蛾眉席上歌
試倩韋郎追正始
風流猶不似元和

晚唐風月一番新
弄粉調膏點注勻
誰與花材詩宰相
聘將花藥作夫人

相之季共各携李
伯時畫軸見過分
韻得人字
人生不相知
白頭反如新
知心不在久
覲面還成親
况我五安師
二妙俱可人
元龍百尺樓
人物誰與隣
風流小安豐
玉樹高嶙峋
聯翩兩竹輿
訪我南坡春
遂遣小

叔雅娛此照坐賓

叔雅昔人酒樽名

王春三月雨浸浸如遊塵

是日天為喜霽色明清晨各攜古錦囊共出畫苑珍太

邱重千載高標澹風神丹鉛表邱壑制度殊冠巾淵明

擷秋菊醉面玉色勻龍眠賦遠遊濯髮天池濱二老不

並世異世真同論當年天廐馬調御皆服馴絕域來象

龍地行俱麒麟老眼閱神駿摩挲得逡巡客意亦復悅

領我杯中醇尚苦江夏帖入我幽夢頻倒篋倘有意叩

門君勿嗔

文若自華亭携家來遊西湖袖出新詩其歸乃

和前篇聊以當別

黃郎滿袖出新詩別後篇章欲造微老驥但含千里意
翔鸞還帶九雛歸如君好事真前輩笑我為生盡昨非
小別不堪頻作惡灞橋楊柳亦依依

次韻林察院賀章正言得子

海中仙果著新枝可是香山得子遲

劉夢得和樂天詩
有海中仙果子生

遲之雛鳳遠從丹穴至神駒初出渥洼時平生種德無

遺恨他日傳家有是兒聞道長庚曾入夢已應能作上

樓詩

唐人載李白襁褓中其家携之上樓問頗能作詩否即應聲作絕句一首所謂不敢高聲語恐驚天

上人者是也

全一道人分以石芝味極平淡咀留牙頰間良

久乃甘而世罕有識者或云九華山中亦有

之

淡中得味世誰知晚歲因君識石芝甘蔗何曾有佳境
人間只好誑癡兒

自聞青壁是芝田
心到蓮峯最上巔
且覓微甘供一笑
海中無藥解長年

席間分韻送王季共得浦字

烏衣說諸王
人物世足數
至今有雲來
眼色照天宇
誰知靜秀中
有志良未吐
時從雲夢胸
噴作秋江雨
中郎騎生駒
世亦號文虎
才高公自出
步驟真接武
名當在戶前
意豈甘噲伍
三年隸工曹
一舸輔江浦
風流各雲散
相見定何許
臭味苦無多
酒行君竟舉

飛卿携去臘書見過中有詩次韻

强着玄端與沐猴隨人作計偶乘流昔時來往從三徑
今日崎嶇念一邱千里回思家似夢十年贏得髩雙秋
緇塵滿面君應笑京洛相逢只自羞

題錢少愚四畫

一點傷春恨看成兩鬢霜如今無此夢莫畫兩鴛鴦

浦鴛

一作東吳去回頭又十年可憐江上雪空落釣魚船

雪釣

事去空千載何曾有若人只應煙樹裏便是永和春蘭亭

雨足三湘岸烟含七澤秋可能無尺地分得庾郎愁

秋觀

隆茂宗鄙余所得蘇後湖像別為作短軸超然

有物外意

高人本難名畫手不可俗世無癡虎頭丹青浣冰玉支
郎唾俗畫為我作短軸遂出三昧手觀此真面目衣冠
有山林風味到僮僕悠悠跨蹇驢眇眇出寒谷薄暮殊
未歸落日下古木未知適何門敲門看修竹無酒意闕
然鷗夷尚空腹長鬚頗解事歸騎不敢趣更復問前山

誰家酒堪漉

僕訪呂晞樸排岸方造舟翔鸞不及見後數日

有詩次韻奉謝二首

太常何敢醉如泥休沐相尋見亦稀
倦著青衫君未可老遮烏帽我當歸
翔鸞寺裡停烟棹西子湖邊看落暉
安得劇談同一笑孤蓬六尺去如飛

此生隨分本何知人品非高論亦卑
早歲囊書羞賈傳暮年學圃羨樊遲
江鄉老去多歸夢樂府秋來得妙詞

晞撲近示秋郊二章詞
意古雅有樂府之遺風
八節上灘休入句
花姑載酒可

相期

河鮪之美唯西施乳得名舊矣而未有作詩者

戲作此詩

吳王宮中半吳女
選入吳宮歌白苧
姑蘇臺上看西施
羞得紅粧不歌舞
青絲籠髻雲剪衣
玉垂雙乳膚凝脂
香羅對畫兩鵝鸕
半約胸酥人未知
邇來紅魚新入饌
西施乳入詩翁眼
醞白還驚春雪溫
細理不知燕玉軟

坐中嘉名思昔人未許八珍當禁臠更將人乳作蒸豚
可笑此郎風味淺不知柱下風流張相君暮年飲乳不
飲醇帳中侍兒知有幾當時西子今未聞白闕自笑竹
坡老烹鮮誰餉杯中珍江瑤斂袂敢爭席一尊伴我拋
青春

寄秦峽州書尾悼侍兒之亡故篇末及之

當年淮水未歸時紫塞天塵玉座知今日臨邊須老子
莫辭萬里擁雙麾峽城真在楚雲間聞說豐年訟亦

閒獠洞無兵
秋日永滿傾
醺醺看青山
斷雲飛在舊
陽臺無復襄
王夢裏來
十二峰前何處是
郡樓凝望想徘徊

吳中舟行口號七首

自吳歸宣
出守興國

白頭人自日邊來
澤國風帆破浪開
已近玉樓船又去
却回愁眼望蓬萊

雨入青秧水滿川
吳儂相對話豐年
時人盡說吳中好
看我蘇常買薄田

西來蕃使換氍毹
裘渡海風帆入帝州
醉裡宮花紅壓帽

千年今日記千秋

是日舟次海昌道逢金使

當年戈甲過垂虹
聞說樓船照水紅
賊去烟波已如鏡
却還風月與漁翁

昔年誰此試青萍
很石中分劍氣精
光焰未消劉項起

始知不殺是神兵

虎邱山有大石斷
傳后皇試劍於此

久陪三館瀛洲客
屢拜蒼龍宰府茶
更覓惠山烹雪乳
餘甘歸與故人誇

水從吳尾入湖流
身到江南第二州
故國舊交應笑我

十年飛雪上人頭

海昌舟中雨過晚涼二首

白板舸艍鐵裹頭吳歌聲在藕花洲
故來急雨歸何處
和月吹涼入拖樓

卧隨鶴鷺入荷香
笑却蒲葵借晚涼
凍雨釀雲遮薄日
小舟添水送歸航

曉發吳江晚上姑蘇臺

掛帆早拍雲濤堆
落帆暮上姑蘇臺
天沉海嶠鳥飛去

雨入太湖雲不來西施白苧豈復唱吳王故苑俱成灰
誰能與子論許事倚欄共聽漁歌回

登垂虹亭

雲水蒼茫共渺然眼看飛鳥沒蒼烟山圍百雉吳王國
風急千帆震澤船白髮飄流身已老斷編零落事空傳
誰將無色胸中畫貌取吳中萬頃天

惠山泉二絕

石龍噴雪繞山斜桑苧祠閑一幅紗只對清流已無暑

未論絕品解宜茶

山僧知我去匆匆旋印紅泥乞老翁擬喚人間三昧手
共分天上小團龍

僕歸自武林蒙舒元相徐美祖諸君皆惠詩乍
歸老倦未蘇姑以塞後時之責耳

紅塵染盡去時衣愁入雙蓬鬢髮稀故國幾番隨夢到
長安十度送春歸懶看烏帽朝訶馬却憶黃紬晝掩扉
鳥倦知還我已老會令雙鵠貼雲飛

相國風流元有種徐卿屐屐固應稀青衫好着君猶未
黃髮無多我合歸清夢曉聽湖上雨暮年猶借水邊扉
南來未是安巢鳥擬趁西風著處飛

王元東寄長篇病中未能和韻先寄此詩為謝
白璧嘗遭按劍疑古來投分要相知驚人未有平生句
絕妙空貽幼婦詞我亦去為廬阜客君應多寄輞川詩
來書更覺寬陳債八節灘頭上水時

次韻元相閱猥藁見贈二首

無物能娛老冥搜興漫長數莖空撚頷一瓣與誰香

后山

詩云平生一瓣香敬為曾南豐

歲月搖雙鬢鶯花惱客腸更哦秋士句

聊與伴啼螿

挽得非來句頻哦送夜長詩今逼何遜人亦似黃香擬
答琅玕贈慙無錦繡腸秋風又撩客啾唧動寒螿

次韻美祖用元相韻以廣后山之意讀之汗下

愧不自勝

晉魏分騷雅詩流本日長應傳少陵鉢莫炷老僧香俗

眼無涇渭從誰話肺腸感君韶護耳來聽菊籬蟹

二

白璧光元在青雲路亦長海天從逐臭郎署會含香唾
玉分新句澆愁浣俗腸從今秋夜枕霧草厭聞蟹

謁梅公墓

當年蠻錦織梅花此日蒼藤立暝鴉白水碑殘猶結客
潁州兵亂已無家何年有客常留劍舉世知誰可押衙我
一舉杯澆馬鬣更從底處問侯芭

次韻飛卿二首

赦黃新拜日邊書
盡舸行游雨外湖
粗有微官如漫叟
苦無高論似王符
江邊孤壘應千里
天上神州夢九衢
物外故人今遠別
固應憐我不同塗

聞道州閒可讀書
綠荷朱閣繞平湖
慙非萬里青雲器
未稱中興赤伏符
來暮不應歌叔度
久窮聊免哭唐衢
君當別我休辭醉
我亦匆匆恐問塗

將赴興國別同社五君子

欲傾杯酒話平生又解孤舟作曉行有友五人那忍別
去家三歲若為情一時但恐無耆舊四海誰言有弟兄
歸路若隨清夢到江南雖遠不多程

宿能仁作

時赴興國

吳帆送我作東歸雙玉重新見兩溪腳踏故鄉猶未穩
仍攜十品過江西

僕將有江西之役證公老師自龍谿來訪僕於
家已而遂至春谷送別二首

兩翁投老各華顛往事重論亦黯然只有高情無歲月
相看依舊似當年

羸驂相逐犯風埃行盡千巖未肯回送我漳淮三百里
道人何止過谿來

過九華作


隔路仙凡欲問津馬頭空厭沒黃塵傷心不到牛欄港
九子山應解笑人

梅聖俞嘗為建德尉僕過是邑詢之果然且言

今有梅公堂在焉

百年遺像鎖寒廳氣壓長江賈尉輕誰道都官能闕識固

應梅福自知名人猶能說當時事詩亦懸知早歲成泉
下玉山呼不起可憐華屋漫崢嶸



太倉稊米集卷三十四

欽定四庫全書

集部

太倉稊米集卷三十五至

詳校官庶吉士_臣李如筠

主事_臣呂雲棟覆勘

總校官編修_臣倉聖脉

校對官中書_臣高中

謄錄監生_臣范鳴謙

欽定四庫全書

太倉稊米集卷三十五

宋 周紫芝 撰

詩四十六首

夜宿堯城寒甚明日山中有薄雪馬上賦二詩
剪水飛花點翠巒未教全放玉屏顏分明六曲屏風樣
和雪新描著色山

雲意悠悠晚尚堅玉塵猶未破清寒不知誰把千巖雪
付與詩翁馬上看

梅山宗老惠近詩明日自山中來訪余堯城驛

二首

梅山寄我近來詩便恐諸郎氣盡低
雙井派中真法嗣
莫將輕比順闍黎

參得詩中句外禪
頗知經歲杜禪關
要須覲面親分付
不免煩君一下山

過狄梁公墓

高后王諸呂漢鼎幾半傾
絳侯入北軍有意誅鯢鯨
兵

纏未央殿血濺長安城祿輩僅誅滅四海殊雷驚唐家
女主禍未可方西京艾豕剪宗枝賊計殊未成三思本
么麼白面不足黥舉朝無直節但畏羅織刑梁公挾大
計赤手無寸兵為言不附姑禍止談笑平功比漢諸人
優劣不用評事苟以理勝口舌亦可爭師曲舉必敗勢
力未易憑老婦雖至愚理在見自明不然此危邦詎可
一言興

琵琶亭二絕

舊事無人作短行
湓江空自繞湓城
黃蘆苦竹依然在
猶替琵琶作怨聲

捍撥難傳不盡情
琵琶聲盡繼琵琶
聲風流掃地無人說
只有空江舊月明

陪李使君登庾樓是日雲霧不見淮山

跨江雲夢不勝寬
樓在江聲洶湧間
試看坐中尋得句
說君眼力盡時山

樓前江水看鎔銀
江外淮山色未分
安得長驅鱣魚手

爲開南嶽嶺頭雲

九江趙倅新作環季亭

小攜樽酒作清游
尋得方壺最上頭
山在斷霞明處碧
江從白鳥去邊流
苦無健句爭天巧
賴有新亭慰客愁
他日東南論勝地
未應只數庾公樓

題東林香山像

大唐受歷三百年
文士輩出俱可傳
情雖嫵媚中骨鯁
當時只有香山賢
香山年少謫湓浦
卧聽琵琶心獨苦

想得回舟夜半時半濕青衫淚如雨別來江月幾番圓
黃蘆苦竹空淒然風流掃地那復有但見東風吹白鬢
可憐畫手無前輩欲倩虎頭呼不起瓊枝玉樹了無蹤
鐵撥鵲絃何用爾明朝一舸下潯陽月明依舊空江水

借書

到興國

牢落偏州少士夫一鷗求借是書無道山堂外長廊下
黃卷如雲記石渠

課吏抄書戲作

雪花飛上白髭鬚
繭紙猶抄細字書
莫笑老翁兒戲子
政緣長日要銷除

湖亭懷舊三絕

鈴索無聲訟牒空
妙香寮外水冥濛
長安故舊如相問
今在江西道院中

校書天祿想諸郎
應在蓬山語畫長
記得去年秋七月
日斜香轉曝書廊

白頭武部最風流
便是汝南陳太邱
折角烏巾人似畫

與誰同伴兩山游

沈季卿出元具茨王相山詩卷相示兩翁雖存
沒異途而均為不偶讀之良增慨歎為題軸

尾

沈郎帶減不勝衣瘦甚由來政坐詩試數交游盡前輩
便知文采照當時子猷何處尋脩竹漫叟今誰弔舊祠
人似浮雲忽吹散老夫雖健髻成絲

寄題陳醫安樂堂昔山谷聞四休居士之言曰

此安樂法也陳君蓋取是語以名其堂

六塵欲要淨三摩辛苦修行奈老何只得四休安樂法
一身受用已為多

自笑區區老倦游廬山今是我菟裘暮年欲覓安心法
他日敲門問四休

送陳鄂州

舊識君家小仲容步兵今復此相同誰教楚楚青雲器
來照鬢髮白雪翁廬阜故山休入望武昌官柳正搖風

只應黃霸歸朝日已在天邊尺一中

牕明

牕明有斜日几靜無一塵向後有餘恨亂鴉來聒人

病起步至湖亭

雨從今日十分晴病後春應一倍增著地已無殘歲雪
掛簷猶有上元燈

薄羅初欲換單衣社肉裁分燕又歸喚得春來却催去
滿庭紅雨杏花飛

病餘猶著杖藜扶
臨水依然一老夫
不用苦燒紅蠟燭
桃花解笑白髭鬚

弔梅

飛盡江南泣雨枝
韻高猶共雨相宜
洗粧只有唇紅在
也勝桃花好面皮

傷心不見玉扶疎
丹杏縹桃亦甚都
只恐此君零落後
餘芳要自不如渠

春日連雨湖水大至二首

楚地春三月他鄉客二毛愁懷須著酒寒力尚欺袍細
雨淹花濕顛風拍浪高昨朝紅藥柱今日整漁舸

二

白雨鳴珠琲春江灌玉壺漫郎回小艇摩詰畫新圖山
近醒愁眼州閒養病軀如何樽酒地更與看南湖

秦少保生日詩三首

歲當作噩律始催杓樵龍角星紀回祥雲下覆窮九垓
帝車御極雲旗排夜色清潤明三台昂精叱馭天上來

上帝欲遣清風埃漢家雙闕高崔嵬日趨龍尾朝蓬萊
父師有鼎調鹽梅公贊廟畫衆允諧龍顏一笑天歡咍
虎皮蒙甲卷不開白玉彫俎尊有需五風十雨無煙霾
燿火夜上通天臺禮成一代誰可偕功高欲報帝所懷
大用永配德與才壽廟祝之言可該拍肩俱願齊洪崖
跨鰲昔上環州山恍如夢見非人間黃金作屋碧玉椽
靈芝仙草香流泉琅函玉軸架挿天神龍守鑰秘不傳
天書錯落御墨鮮泥金描鳳寶帶纏中有紫府遐齡仙

主張東壁宗衆賢天風獵獵吹廣寒霞漿酌客春晝暄
藥珠琴心久精妍靈根堅固玉鍊顏三官四輔誰可遷
看公衮繡當帝前拾塵筭却不計年

右文天子朝明光漢陛曉列千官行罷朝不歸按霓裳
黃門羣襲御殿香翠蓋趣駕黃微張日高宮樹遮回廊
侍臣進冊儼在旁香羅覆帕牙籤長前規堯舜後三王
六維龜鑑策最良聖心自約昔未堂日有所就月有將
公書萬卷胸中藏海涵地負誰可當官粗住下百報忙

獨留真儒傳紫皇
茶甌拜賜近御床
天顏咫尺瞻龍章
金葉舊事不足方
人如褚馬才亦常
說定惟服寧可忘
設施行當見廟堂
可使風俗還軒黃
有時問道崆峒鄉
廣成之師壽百昌
千有三百歲未央

二月二十三日遵奉聖詔出郊勸農謹賦詩一首示諸同寮

星言出郊坰
緩轡遵微塗
陂池湛新綠
阡陌開上腴
春色嚮晚晚
農事日已趨
有司奉漢詔
訓辭宣帝謨
父老

數十輩龍鍾白髯鬚扶杖前致詞謂當極勤劬曩也事
格闢今當反田廬農桑遂溫飽里胥絕征誅茲焉不少
力是自貽瘠臞椒漿酌大斗起坐時歡呼有如一日蜡
相期悅須臾殷勤頗自愧小信殊未孚儻非獲三登何
以謝汝徒同寮數君子妙畧懷永圖願言規遲暮共此
豐歲娛

次韻溍宰題妙香寮

香嚴參鼻觀可受郢人斤誰能論許事且炷松爐薰借

此沈水力侑我斐几文小閣亦窈窕青烟散數紛與人
共婆娑此意良殷勤恨無博山賦可寫蜀錦紋老人住
江東來作江西雲江湖渺歸思先弟無餘芬焚香此幽
事此外何所欣如人嗜昌歆豈復思羶葷令君出新語
種學窺多聞但恐燕寢句頗慚韋使君更當宿殘火薄
霧看氤氲

劉德秀縣丞九五和前篇僕亦五次其韻

劉侯一諾重勝獲金百斤秀句忽復出華名愧微薰但

憐溝中斷枉錯黃金文君欲強推轂誰當為解紛顧我
絕世好百念獨此勤鵲尾得古製鷓鴣玩斑紋時從孤
巖頂看上秋空雲遂作小方寮調護留清芬忘言聊復
爾念意亦可欣了知法界中清靜無五葷倘非此地勝
是妙數得聞誰知几席間中有造化恩遂此草木性一
氣蒙氤氲

楚澤是魚稻不論斗與斤老守睡足處飽飲聞餘薰時
歌郢人曲細和湘纍文天風一披拂花砌飛繽紛樂此

盡日靜頗無終歲勤劉侯過我數坐久衣成紋時驚燕
梁句有似春空雲千年論往事一炷同清芬有客乃如
此我意豈不欣人生如草木臭味殊薜蘿海天得彼趣
妙香吾所聞庶希清淨化上答明聖恩從今世外樂可
比洪崖氤

蔚宗草香傳水沈貴盈斤標置何必高有德當自薰士
成稍蘊藉往往嗔斯文人生顧安用浪為此紛紛我靜
偶獲趣君意良復勤摩娑辨欸識共玩古曹紋青烟既

司寒小孤方插雲詩應神所授句與爐爭芬懸知我輩
事俗子未必欣不容芝蘭室雜以蒿艾葦政恐千年後
餘鼻尚有聞惟愛青雲士亟拜黃屋恩未知誰氏子肯
對香氤氲

念昔居上國春薺賣作斤那得千金囊可買百濯薰一
為道院主坐空朱墨文清茄咽悲壯濃篆橫披紛幽意
可略喜老倦復小勤詩如水得風自然偶成紋香亦旋
變滅頗類無心雲丞哉兩松篇時出水麝芬鏤永納蔬

腸爭洗三韭葷敏手不可敵勝妙昔未聞豈不勝兒女
呢呢相怨恩人生如此少爐烟且氤氲

隱之刺五年歸囊香一斤恕投湖亭水內子無飯薰欲
草廉吏傳恨無班馬文此風一凋落披靡如絲紛前身
是香嚴宿習今尚勤爐烟凝室炷印篆緘雕紋嗜香猶
有癖於世已如雲况今花木妍香風度微芬節物豈不
佳老洗難強傾太常齋日多十飯九不葷唯有鼻孔香
時於靜中聞未知劉季和何如荀令君且當置是事一

笑同氤氲

蘇內相在黃岡嘗從桃花寺僧覓茶栽移種雪
堂下余始至此會歲且暮明年春得新芽試
之色香味俱絕不減湖越二疊宜其見賞於
此老人也人言雪堂今已鞠為館驛茶蓋可
知矣

梅雪既掃地桃花露微紅風從北苑來吹入茶塢中真
香不可說玉色誰與同不知耐幾湯成此三味功頗渚

與日注名高各雌雄四海一大地所至皆春風物固有
不幸乃爾殊窮通此品不見稱白雲空蒙茸移栽雪堂
下賴有黃岡翁來禽青李帖絕世無此工遂使桃花名
遍滿江西東此老久下世真賞殊未逢只今調粥手乳
花為誰濃堂今在館驛樹亦知何蹤樹固不足惜館驛
行當空

筠陽竹根枕

高安老竹三尺圍斷為釜甑中可炊蘄州開苗不足數

嶰谷截筒空自竒何如猫頭未成竹化為霜根白如玉
崢嶸勁節不得施歷碌黑斑空滿目白頭老吏飽官倉
雲夢南州睡初足筠陽別乘一幅書寄我中剗兩枵腹
飄飄逸韻青衣郎夢中相見筠山陽一笑摩挲撫君背
定教從此毋相忘我欲問舍無何鄉為我往使華胥王
人生草草兩鬢霜要知日月壺中長

四月五日早晴二首

老病猶朝朔華顛尚著冠馬頭收雨去湖面拍堤寒鳥

作鄉關語花如夢寐看晚來還倚杖看日下欄干

二

憶作西來夢猶堪細數程隨雲千里到看月五番生上
箔蠶宜暖瀕湖麥要晴天應憐病守有意在秋成

四月八日燕客湖亭風雨忽來頗有波瀾意欣然
然悅之

水平真欲見秋毫碧海無人制手巨鰲多謝西風卷烟雨
肯來湖面作波濤

孤山十載飲湖光更入江西鷗鷺行官舍一生常近水
前身應是水仙王

白雨跳珠水上鳴雪花吹浪酒邊行不嗔燕子飛將去
最愛鷓鴣睡不驚

千葉石榴盛開為賦一詩

江東五月榴花紅江西三月滿花叢東花窘東少態度
西花重疊紅蒙茸誰翦燕支山下草乞與殷紅照林杪
移栽我欲過江東銜子鴻鵠今成空紅巾羊蹏為誰苦

芳心何止千重重試遺紅粧歌一曲此花此曲何由逢
春光都無十日事不成夜雨還朝風紅芳莫遣忽飛去
斷腸烟雨空溟濛

十六日對雨是日間得濂溪地

大麥結穗牛尾長小麥滿地秋雲黃清漣堂前今日雨
中有廬山湯餅香故人喚我廬山住欲買茅椽近廬阜
得田於我復何求只就天公覓甘澍天隨農父與陰晴
雲共東風作朝暮山南山北水長流下田高壠禾無數

秋堪釀酒醉不醒飯可充飢飽摩肚先生不管醉尉呵
拄杖尋遊遠山去

太倉稊米集卷三十五

欽定四庫全書

太倉稊米集卷三十六 宋 周紫芝 撰

詩五十一首

鼓鑿鑿行

煙雨淒淒芳草渡隔岸鑿鑿賽神鼓男巫唱歌女巫舞
懸宜青桑麥宜土天下無兵三百州不如賣劍買汝牛
千倉萬廩汝莫愛富民今歲新封侯

午睡為流鶯作歌

擬倩花枝當綺羅更煩鶯作緩聲歌未殘春色猶堪惜
已老周郎奈若何

樹裏金衣不露身欲尋啼處了無因綠陰長得成何事
遮却黃鸝最惱人

江南草長亂啼鶯睡足南州得細聽最愛欲歌還欲住
伴人如夢亦如醒

寄黃超然監丞求山谷像

黃人生不恨幸識元魯山平生黃叔度常在夢想間時

於絹素中得見冰雪顏晚乃客京洛髯孫始追攀眉目
真似之典刑今未刊昔我在武林歲月不得閒甚欲貌
公像歸囊竟空還適從同寮家小軸得細看芒屨方釋
杖野服不著冠尚恐或非真蠹蟲亦少殘謂言君家本
可惜石竹難願君呼畫史摹寫來江干孫郎傾蓋交臭
味同芝蘭能事亦須趣勿作水石慳君不相我請幽興
恐易闌

次韻沈季鄉題醉山堂

看盡吳頭楚尾山不嫌心似鳥知還可憐樽俎登臨處
正在烟雲杳靄間地勝豈無神物護天教付與老翁閒
憑欄欲喚君來語家住寒溪第幾灣

送呼延韓仲

人生何苦著儒冠心與功名了不干早歲氣吞雲夢澤
暮年身作灞陵官欲尋故國今安在漫醉醺樽不當歡
老別相逢知幾日花鬚句在好重看

韓仲見和勸農詩
有況此春欲暮風

溫脫花鬚之
句語意俱勝

晚思

落日下平蕪
回照東湖尾
牛從何處歸
相隨渡湖水
幽人倚欄意
得月猶未已
白鷺知何為
欲下還復起

送劉德秀赴官貴池

劉郎人物照當時
未上青雲莫慢遲
秋浦江山應似舊
藍田雁鷺不妨詩
銷魂怕作文
通別問字誰如伯
始知此去醉山梅
欲動憶君同看雪
前枝

李卿惠詩頗寓窮愁之意作是詩勉之

君有篇章配國風
技兼鼯鼠固應窮
但令人似千金壁
莫恨門生一丈蓬
北阮有生寧免俗
蒙莊雖放亦求通
會看黃鵠摩霄去
未可輕投燕雀叢

秋意

江城木落又秋高
歸夢難成客鬢凋
擬倩西風吹雨去
莫來窓下打芭蕉

十月晦日郡席見鵝梨

雪後新嘗澱齒泉
樽前風味固依然
自從北郡無人到

不見驚梨今幾年
魯酒謾傾猶病渴
并刀未下已流涎
從今莫覓張公種
釘坐雖多不當賢

題向司戶薌林圖

宸奎猶作麝烟浮
便艤歸航結小樓
何處訪求三島路
徑須圖畫百花洲
黃金殿裏鷓鴣夢
白鷺江頭草樹秋
天上歸來輞川住
世間那有此風流

臘月二十三日郡廳禱雪宿齋房趙尉燈下送

蠟梅

半昏燈火宿齋房驚見梅梢破蠟黃
夜靜月斜簾不卷
步虛聲裏得花香

正月十四日夜病在告雨中不寐示劉德秀

雨意淙淙客夢惝病來無意近歌壇
看他紅袖傾春酒
分我青燈照夜寒老子要非年少伴
醉鄉空願故時歡
懸知鄴下劉公幹猶擁書檠午夜看

題李伯時畫歸去來圖

淵明詩成無色畫龍眠畫出無聲詩
兩公恐是前後身

二妙畧殊今昔時我頃誦詩不知處今乃按圖俱得之
當時想見歸意好扁舟颺水風吹衣壺觴未飲入室酒
玉色先見迎門兒豈無故老說情話尚有殘菊依東籬
雲歸鳥倦自有意欲辯已忘誰復知龍眠得之心應手
筆所到處心相隨僮奴似有傲世色草木亦帶烟霞姿
癡兒方辦公家事此老自挾南畝犁人生異趣豈不遠
心如鐵石終難移我今此意不自事老去見畫空慚非

次韻范提幹二首

繡衮華貂侍禁宸忠宣遺烈在絲綸傳家父子俱仁孝
蓋世功名孰比倫閱固知流派遠衣冠今見典型新
如公自是青雲器不作劉郎問大鈞

白頭於世亦何能欲賦歸來計未成孟博聲名追往昔
蔚宗文字慰平生風流易散嗟人事臭味相求豈世情
欲唱清歌送行客不知誰是米嘉榮

客夢

客夢長千里官居已歲餘却愁花藥動轉益鬢毛疎山

氣朝朝雨江苞月月魚匡廬早歸去稚子可籃輿

次韻強使君見寄

夢澤南州聽曉雞老饕於此寄朱麾春湖魚上先分玉
暗谷茶生看展旗

鯽魚桃花茶皆此邦嘉物

酒甲江西聊可醉山橫

楚尾恨無詩

富川酒冠江西

年豐訟少知何事時有光陰到楚

詞

次韻黃叔魚見寄

江邊熟睡不聞雞高臥何功尚擁麾千里西風飽魚蟹

十年驚魄夢旌旗名慚公瑾終焉用人似黃香更好詩
欲作報章無妙語楚歌唯有竹枝詞

湖亭之勝大似江上但無蘆葦二月二十日移

植數十本

大年著色山前雨摩詰無聲句裏秋已是湖山無限好
更栽蘆葉伴輕鷗

杜鵑三首

甘王祠下杜鵑啼句句聲聲是說歸安得一家三十口

似君兩翼解高飛

千秋但有一淵明肯脫青衫事耦耕

陶

漢朝俱此老

都門誰祖二疏行

窮甚亦須餅有粟天寒可遣婦無禪杜鵑不大知人意
歸計應須與細論

聞真如牡丹盛開偶憶去歲看花之會

記得東風隔水村偶逢幽艷薦芳樽今年多病無行樂
更怕春寒不出門

春來花草盡開愁風雨妨人懶出游不見鞦紅去年面
可憐孤負玉風流

郡酒名風流泉

謝王侍郎寄東倉祖送圖

都門供帳記當年十里旌旗暗畫船文石班中天上客
水晶宮裏地行仙鈴齋妙畫人間見相府珍篇海內傳
錦軸牙籤渾未識忽隨雙鯉到家邊

抗章聞說動前旒分得東吳第一州久與衣冠為盛事
更尋雲水作遨頭當時鵷鷺應須記此去湖山莫謾留

却笑杜郎生羽翼但知歡喜下汀州

杜牧自少卿出守吳興當時有捧檄

汀洲去全家羽翼飛之句

次韻李安州贈別

老來著處便為家行盡江西是水涯
詩到說歸無限意山非吾土未應嘉
我思故國方成恨君到東湖尚有花
更欲少留聽句法公詩已似玉無瑕

次韻李安州紀贈二十韻

衣冠數人物伯仲高人間我於鴻雁行
疇昔奉往還掛

名華萼集遂爾不復刊暮齒慨晚晚得州近荆蠻恨公
識面遲又復容追攀高風薄雲漢秀句橫筆端乃知同
氣中文采真班班誰將鄖城水換取蓬萊山要公撫凋
氓天意豈等閒玉階有餘地行歸鳴佩環上最不待久
唾手未苦難念我老已熟無鬢堪成班江頭忽三月坐
見春物殘相逢喜傾蓋往事論險艱一飲未徹席扁舟
渡驚湍情鍾惜易別易別成永歎可憐堂下水故作聲
潺湲風流倏雲散人生豈長歡願公寄尺書細行勿輕

刪仍煩巧匠手著意鐫堅頑

北湖暮春十首

東君無意惜花殘留得青山隔雨看可怪天公不憐客
綠陰成後却春寒

北湖看雨兩春餘忘却漁村笠澤居去歲鶯花猶是主
今年鬚鬢不勝疎

花到酴醾欲盡時一春已是燕游稀舊來持酒聽歌處
乞與東風燕子飛

幾日春風自在顛誰家相喚上鞦韆難留花住那堪雨
不奈天寒更禁烟

洛紅聞說爛如霞應著青油密護遮莫剪姚黃供老眼
使君頭白懶看花

韋郎詩淡少人傳貪看仙書不愛眠閒礪小團新樣月
撥灰重試古龍涎

西施乳白魚供箸樊素唇紅果薦新不恨江干春晚晚
旅庖猶是慰愁人

富川二物春晚上市

落絮天慵草漸勻
最遲紅藥又成塵
苦無黃鳥能歌舞
連日春陰悶殺人

燕梁夫婦幾時歸
養得新雛總解飛
投老卜巢猶未定
可憐人不似烏衣

次韻元相題到花亭

從他白髮三千丈
莫管人生七十稀
滿載月明歌一曲
到花亭裏醉中歸

送李瑞昌

廬阜老人心古錐
頗學子長多愛奇
晚生恨不見前輩
一談往事神先馳
龍眠人品似摩詰
不比老闕

閻呼畫師往時袖手閱神駿

三馬就斃何由追
都人一日傳萬口
後生聞此心懷疑
諸孫今喜典型在
此事頗從君得之
吾皇仁聖重賢士
子孫必錄初無遺
但令苛政不如虎
會有善事令天知
碧油擁被報政急
桁楊臥壁催科遲
他年父老歌遺愛
為君摩石題蒼碑

余手植木芙蓉數十本山亭之下比聞頗為群
羊踐履

春去無花伴白顛旋栽紅艷照霜前
髯郎莫剪柔柯去
留作秋風一醉眠

送高仲思提幹

獼猴莫厭土牛遲天馬能行老更奇
論事頗遭官長怒
潔身惟恐世人知
簿書奔走聊應爾
臺閣飛騰自有時
雲落斷鴻誰是伴
尺書何日慰相思

送瑩老住灌谿

一年身寄水南村誰把禪床一席分
去住隨緣本無意道人蹤跡似孤雲

竹坡無物可關懷只有青山眼為開
未識灌溪真面目煩君著句畫將來

送楊師醇之臨安兼呈師古

家在湓城五老山與君相望各江干
如何肯撥艤艫棹便欲來同肯綮盤
傾蓋盡知今日意買隣仍結舊時歡

菊觴澆酒無離恨淡榜書名看二難

令弟登科師醇新除皆在來歲聊見

篇尾

擬省題桂林一枝詩

晉祚傳千載賢科重一時擬橫金殿棟先剪桂林枝月窟根盤壯烟巖雨露滋孤芳寧有種凡木自多姿臃腫樗空大風流柳漫垂惟應太邱令功德季方知

秋來久不作詩書所感

雨颺江濤壯天含暮靄低年華添老色風物似年時富

貴渾無念情懷不到詩度秋無一語已是俗人為

寄李安州未得別後書二首

未得安州信空添楚水秋雁寒飛不到江遠望難休去
國雙紅旆攜家兩白頭可能無一字分慰老人愁

二

鄂渚他時縣江南盡處州平生求識面此地忽同遊湖
外公開府江邊我上樓尺書何日到能寄近詩不

太倉稊米集卷三十六

欽定四庫全書

太倉稊米集卷三十七

宋 周紫芝 撰

詩三十五首

送富川秋舉王君子

雲衢欲上馬蹄輕，莫問長安路幾程。
雙劍竟須騰巨澤，夜光元自當連城。
偶因勸駕江邊日，猶記臚傳玉陛聲。
某前舉攝行承旨司公澹墨榜知何日出，
事傳主殿陞職在臚傳擬開春筯為君傾。

寄小兒琴書二詩因趣其歸

黃梅雨熟汝辭家數得秋風到藕花書裏懸知有歸日
醉中不復問年華

廬峯今已卜菟裘心共長江日月流莫待西風彫綠草
速來隨我上歸舟

次韻強幼安中大以僕築室濂溪見寄

歸去來兮復幾時臨流屢欲喚篙師種杭有地供飢腹
佩犢無人作去思偶著衣冠真是夢倦尋邱壑已嫌遲

如今真在廬山裏二妙堂成更乞詩

僕所居山頂作堂下見長江廬阜故

妙號二

強幼安中大示樂聞過齋記以詩為謝

白壁摩挲未有疵榜齋銘座尚防微欲從今日求聞過
故說當年是昨非言行固知無裏褻吏民何處不恩威
欲參函丈師全德此去應須便拂衣

題趙倅家獐猿圖

易生畫手妙幻出猿與獐雙猿掛樹枝二獐回目光烏

衣白面兩臂長雌雄相逐爭跳梁秋山果熟腹自飽雲
蹬路絕人誰傷下臨長嘯頗自得那愁解舞緋衣郎二
獐驚怪久眈眈深羨兩猿高據烟林藏猿狙喜怒不足
說獐鹿町畦寧無場枝高地卑能有幾蛇蛇自可俱相
忘富貴貧賤各有適也恐萬事誰能量

雪中同上醉山

駕言陟前岡勝賞追良辰蒼黃憐暮色浩蕩飛瑤塵冰
花似有意娛我坐上賓但恐白糝糊偶失青嶙峋造物

有奇事變滅無逡巡斜陽忽到眼萬疊羅蒼岷戲從壺
中天漏此色界痕况乃文字飲盡屬我輩人老守頗自
愧繆許參冠巾念我千里行維舟在江濱雪既不可留
跡亦恐遂陳置之勿復道且飲樽中醇

送章使君守竟陵

章濤彥博

長江盡此是吾州君去長江更盡頭短棹只添行客恨
清樽肯為故人留飽聽夢澤洲前雨却望蒼龍闕角樓
試問尺書何日到會須紅蓼白蘋洲

金山貫道人跨水作亭余為名以枕流亭成而
僕欲去作二詩因以留別

聞說朱欄照眼新一溪清淺共誰分可憐橋下無情水
不遣龜魚識使君

與師同是一山雲吹落江西却再分聚散人生俱似夢
虎溪重過不煩君

食橄欖記客語

朔風吹元雲欲雪愁江天煙颿駕海舶橄欖來閩川客

言似有理得失亦小偏紅鹽落青子嚼玉宜芳鮮色香
苦未發遂雜春容煎清香雖覆椀翠潤殊嫣然香味元
自若人生浪求全方言田家翁好惡能兩捐一食輒苦
口棄擲古道邊回甘入齒頰拾遺止流涎樸質固可笑
任真亦良賢向來紛紛者妄論誠可憐

次韻桂嘉任郎中贈別二十四韻

是身本遽廬誤得兩朱轡竭來臥江樓白鷗看飛翻驚
鴻卷西風吹落雲水間江山相表裏宇宙殊恢寬但苦

千種愁不供萬疊山幸茲洪崖君仙馭超人寰一身聊
復爾萬事不可干富貴倘無求藜藿亦自安不須金鼎
爐養此玉棟顏紛紛一回睇徃徃俱冥頑有如盜跖手
可鱠朝飯肝居之彼不疑念念我心寒公今梨棗成心
地無險艱橫湖僅一葦經月無寒暄昔為吏曹郎今帶
儒生酸繆從周旋間獲奉澹泊歡公已聞大道我猶縛
枯禪誰知數日惡忽有千里歎古道催行輶滿山霜葉
丹仙凡自此隔無復相追攀餘生幾何時白日飛驚湍

願公追松喬駕鶴駢翔寧爲我亦上五老舉首雲間看

題卷雪樓

甘寧廟樓

三國英雄氣似雲江南只數故將軍借令馬上身猶健
應笑中原鼎尚分謚冊屢沾新雨露斷碑空說舊功勲
斜陽萬里明如雪獨倚欄干酒半醺

大冶山中有東方寺世傳東方曼倩嘗讀書於
此寺後有聖泉凡邑人之乞子於此者隨願
輒得僧慧滿住持十載無日不醉癸酉冬十

二月之吉跌坐示寂九日而色不變人皆攜
酒來酌師至暮必頽頽泚頽狀如醉人然其
事甚怪金山貫道人將赴東方之請於其行
也戲作三詩送之因紀其事使刻之山中以
傳好事者

先生自以滑稽雄何事偷身入漢宮跨鶴乘鸞本無定
安知不到此山中

平生著酒滿葫蘆醉上禪床不用扶更把酡顏驚世俗

方知肉眼是凡夫

誰謂靈泉易感通
解令少婦却愁容
道人應為衆生說
此事如何著得儂

游香巖一小室甚溫潔坐客皆言雅宜聽雪各

賦一首

鵲尾烟橫不卷簾
莫嫌好客坐無氍
道人此室知何用
留與衰翁聽雪眠

曉發永城

時任滿得祠

跨鞍不作永城留馬上烟銷霽色浮便恐匡廬來入望
此行今日是江洲

瑞昌道中梅

我昔西來野梅發今歲梅花似前臘流年別我誰肯留
衰鬢羞花不成折昔非今是未必然尺短寸長何足說
到家淨洗客衣塵猶有匡廬半山雪

時宰生日樂章七首

并序

某嘗觀漢武帝在位既久心喜太平凡一草

木一飛走之瑞間見迭出旋命詞臣作為樂
章載在史牒人到於今猶稱誦之太初四年
獲宛馬作天馬之歌元封二年芝生甘泉作
齋房之歌元狩元年獲白麟既作朝隴首太
始三年獲赤雁則又作載象瑜然是數物者
特以鳥獸草木之珍羽毛品類之異遂見紀
錄不知其何補於治何益於人何功於宗廟
社稷而稱述歌詠之如是其至耶為人臣而

有大功德於天下人主倚以為安危四海視
以為治亂陰陽調和四夷馴服教化修明天
地昭格曠古以來耳目之所未嘗見聞者乃
反不得紀之樂章被之金石曾千里之馬九
莖之芝與夫一麟一雁之不若豈不毀譽失
實冠履顛倒大為可笑哉仰惟上穹垂祐聖
相聿生八表蒙休羣蒼替壽聖天子自我作
古加以寵恩錫之燕喜蓋無所不用其至焉

天下賢士大夫能援毫者誰不作為歌詩踴躍自獻則頒明詔命詞臣寓勲德於樂章紀成功於大筆為有日矣某猥以一介辱在垓陶白首詞官十年之間內職編摩外專城壘栽培枯槁造化餘生蓋將援甲子於泥塗以補山林之歲月則某佩太師公相之恩華嶽不足方重滄海難以擬深周視此身念無以報唯歲以骭骭之詞而祈喬松之壽區區自

謂其殆庶幾焉重惟大德日新陳言屢出不
變故常始終一律重章複句人所厭觀輒敢
易為樂章七疊雖不動望班孟堅司馬相如
輩於萬一他日朝廷採詩之官以撫歌謠裨
官以求里巷之言或將有取焉爾至若宣王
中興之臣如仲山甫方叔召虎之徒功德光
華見於烝民崧高諸篇則必有其人矣詩曰
吉甫作誦穆如清風固所願見而十九章之

詩則義有關未之與也

樂賢臣章第一

毫后出莘野興一德懋三台明歲在午月嘉平聞鼓吹
玉簫鳴醉厭厭椒醕馨閱萬古所未聞肖說像傳堯文
盤誥出德爵尊依日月慶風雲等箕翼奉羲軒願公壽
兮錫公齡

忠貫日章第二

六親和孝慈不出國道昌忠臣不立躋公節秋霜栗繄

公忠貫白日河洛腥黃霧塞鳥獍鳴羣姦集靡它而從
中不沐忠臣飲氣義士戢主在與在公不屈茫茫沙漠
萬里天渺渺歸船海中檣公之歸天為悅願壽公兮報
公節

回瀾章第三

歲在昔時否屯河陽狩滄海渾將情驕霸棘分盜連行
兵蜂屯公決策撫霧霧豐豕封群羊奔佩索韃朝帝闈
姦氣龍言聖道尊三階明萬室歡帝籍功永不刊願壽公

分公永安

單于朝章第四

單于朝流沙暨天降康神樂只坐法宮聖天子稽唐虞
制六藝屬大儒明古義金支張玉帛制告太平備昭事
天馬徠渥洼至朱鳥徠翔九陞願壽公兮報公治

歌泰和章第五

馬牛歸文軌同洛邑宅神丘蒙神光流燿火通君車駕
款郊宮君車回霈澤豐神既娛景冲融俗阜康君樂雍

願壽公兮報公功

泰一徠章第六

排天門羅萬戟升三陔祠泰一旗幡幡鼓吸吸降赤霄
下瑤席泰一徠景貺集歲三登連八極五臣相宇宙一
神降臨罔不吉神言歸恍兮惚願壽公兮報公德

榆中章第七

榆關以北一騎不馳孰窺漢月燧息烽夷塞草春榮夷
氓負犁九州萬井風恬俗怡血屬相保母父子妻既續

厥嗣亦活黃蘗幾億萬年維德所施初雲來睇天之報
之壽之福之劫塵可數此報何期

登元次山新祠

人物推前輩風流自一時空憐灤溪水還繞漫郎祠君
已新華屋吾猶續斷碑誰當知此意只有少陵詩

過劉道士菴壁間見梁祛父蘇季文詩因用其

韻

高臥何由雨墊巾關門聊此寄閒身長生自是君家事

白髮應憐我輩人多釀醉鄉千日酒豈知浮世十朱輪
重來却踐山中約猶有桃花一半春

遷居二首

時已卜築九江

久作懷鄉夢今年拚不歸奉親猶得粟見客已忘衣憑
几看駒過開門任燕飛皇天憐老病留此著柴扉

二

扶病翻書卷移家枕斷城雲空千嶂曉門靜一江橫葉
密催春事花飛惱客情暮霞將霽色招我作山行

傷春二首擬近體

越羅初欲替茸裘二月輕寒比麥秋
潘老凋疎空惜鬢庾郎憔悴不禁愁
催歸燕子春何限落盡桃花雨未休
誰遣少年隨夢去不教人似柳風流

一幅輕紗老禿翁半簾疎雨著東風
長條柳伴短條舞深色桃欺淺色紅
愁思但知嫌酒薄客情終不似春濃
盡將黑海無名障付與邯鄲一夢中

再賦傷春二首


豈料餘生兩鬢皤廬峯猶得共婆娑昔年自作南柯夢
此去心如古井波官冷故人書不到日長齋閣睡還多
文園曾病猶堪酒傳語風光奈我何

潯陽江上聽琵琶買得江天且寄家帶雨衝泥看燕子
隨風著地數飛花人來裹飯何妨病客去張羅亦自嘉
還了世間無限債却修香火足生涯

客自富川來言湖水已到萬波

昔年喚客飲湖邊猶記湖天五月寒白鷺翻空歸杳靄

驚濤卷雪到杯盤
鯢鵬水擊三千里
雲夢胸吞八九寬
想得拍堤春漲滿
又吹飛雨濕闌干



太倉稊米集卷三十七

欽定四庫全書

集部

太倉稊米集卷

三十八至
四十

詳校官庶吉士_臣李如筠

主事_臣呂雲棟覆勘

總校官編修_臣倉聖脉

校對官中書_臣高中

謄錄監生_臣陶鳴珂

欽定四庫全書

太倉稊米集卷三十八

宋 周紫芝 撰

詩三十八首

寄章復州

春來未得復州書
流落他鄉我獨居
今日離羣天際雁
昔年同隊水中魚
遙知賣劍方成俗
想得追鋒便賜車
擬約琵琶亭下月
伴君一醉復何如

南窓植竹數百竿
後數日蔚然俱青
客問種竹

法作四言以告之

平生寡友形影相弔與君結交相視一笑四方萬里動
靜險夷我惟子求子必我隨聿來湓江屋廬既正相子攸
居我室乃定得子之宮於窓之南風莖雨葉蔚其鬢鬢人
言死貓可引活竹貓死地虛根行竹綠又言無法移必
行迷仍標其根以識東西區區百設何乃多事事在眉
睫初無妙理穴地成坎碎土加篩沃以斗水和之成泥
置竹其中實之以土土燥潤久可月不雨逮其雨來竹

既已成熟不受暑寒不變青嗟哉此君以節自負如遇
君子理宜調護君欲何法無法可傳併以告子俾知竹
賢

九江初識水仙

七十詩翁鬢已華平生未識水仙花如今始信黃香錯
剛道山礬是一家

天香不染麝煤烟家近龍宮寶藏邊世上鉛華無一點
分明真是水中仙

新作布裘二絕

青裘短袂瘦軀長，拄杖橫擔古錦囊。
變盡形容人不識，家僮應怪賀知章。

少日無心佩紫囊，一生裘葛是衣裳。
但知野服尋山便，不學唐裝又晉裝。

近時士大夫衣冠制度往往
有效二代者謂之唐裝晉裝

吳傳朋郎中自出新意作游絲書妙絕一時士
大夫皆賦詩為作數語書軸尾

公孫舞渾脫長史妙心畫老兵塗常璽中郎出飛帛得

法自所見豈用規疇昔隨人作書奴終與古人隔游絲

最無事何止但百尺

游絲二字前人語中無及此者惟歐陽公有游絲最無事百尺拖清

光之飛來若有態吹去忽無跡使君看青天意外得新

格映空疑有無著紙互絡繹神機殆天授至技非人積
遂令一絲輕可掛千金石聊將畫沙錐幻出虫網壁我
雖不解書好書乃成癖公如儻有意能事不敢迫

傳朋為作游絲小軸報以長句

竟陵老守尚書郎平生墨妙窺鍾王會令夜鬼助奇崛

更與游絲爭短長游絲忽從天際落洗眼熟視無毫芒
癡兒著意吹不起春風無力難飛揚草雖號聖亦可到此
品入神誰復強使君憐我頗知好五十六珠投夜光溪
藤搗紙滑勝玉古錦縫囊牢祕藏要遣張顛與醉素不
敢與公分雁行

讀司馬長卿傳

揚雄新著草元書却笑相如賦子虛借使曲終方奏雅
比君符命復何如

病起節物可驚效柳子厚

病起忽數日杖策周吾廬桃花手新栽小紅今欲舒萱
草未出土苗葉將扶疎物變乃如此光景難踟躕退自
觀我生今形復何如夢前黑垂髻夢後霜入鬚安得萬
丈繩縛此窓間駒先生可笑人為生本田廩晚汗琳館
粟俾代南山鋤皇恩浩如海臣報終難虛老力雖不足
閒日幸有餘願炷金鼎鑪日誦琅函書跪祝望天門聖
壽如居諸

紙帳二首

雪帳垂空萬事休，醉來高枕竹猫頭。
不知金谷園中障，輸與儂家幾百籌。

荆王翠羽衾中夢，太尉銷金帳裏歌。
若以道人銀色界，雖無歡笑亦無魔。

秦觀文生日詩三十韻

寶祚開蒼錄，炎精表赤符。
乾坤歸聖統，廊廟得真儒。
事借帷籌定，顛從漏刻扶。
兵銷九節度，儀肅五單于。
意與

神明會功知傳記無公師隆化道嗣相協神謨世業垂
餘慶天心究永圖貂冠親日月玉座接都俞自可均調
鼎猶謙謝秉樞槐庭何日見繡衮幾時紆大府連薨棟
翔鸞踵步趨侏儒將入賀象寄盡交孚光耀三台宿喧
騰百雉都傳呼鳳尾諾道從火城驅隔坐恩由占同朝
禮固殊位雖仍亞保望久在中區藝籍明經殿文星照
石渠諸生咨典故列辟奉規摹往歲方平難斯民遍澤
枯大臣俱宿德四海盡夷塗効已知無敵天應信不誣

他年各安堵此日記垂弧雲篆祈千載霞漿賜百壺中
人傳詔旨東閣擁金朱舊物歸龍榜歡聲徹海隅一門
天為喜萬里物皆蘇寒士勤推轂和春入朽株恩嘗蒙
草木才不補唐虞只有祈年頌持為報德珠第慚床下
拜雲嶠隔江湖

題陳大卿三徑堂

一身和影共婆娑看盡人間兩鬢皤要好只銷長閉戶
便開三徑已為多

曉晴

瞳矓曉色上簾旌
吹盡江頭滴雨聲
百歲一生常苦惱
三春幾日好清明
從他落絮隨人去
但趁青山放脚行
尚有詩腸新鼓吹
滿攜樽酒聽黃鶯

楊得臣見和曉晴長句用韻奉酬

西風獵獵轉紅旌
吹盡春霖點滴聲
曉送楚雲歸隴去
夜看淮燒隔江明
舞狂恨我無長袖
句好從君得短行
擬為新晴歌一曲
誰將此調付鶯鶯

再酬得臣

詩翁老去得雙旌慣聽清漣夜雨聲

清漣堂名

水到潯陽心

獨喜雲開廬阜眼先明落花已是春三月飛蓋猶堪酒
數行寄語草元窓下客忍令辜負曉啼鶯

再酬得臣

歸心何事等搖旌叔起能詩近有聲豈料從遊如夢寐
不知風雨過清明拍浮我自堪娛老矍鑠誰應更請行
此去定交君見許為歌伐木賦鳴鶯

再酬得臣

上最初無善可旌歸來和雨聽江聲自憐老眼昏花甚
乞得晴窓夕照明蓮葉繫舟驚水滿魚須拄頰看雲行
君能著屐時相過猶有殘春一雨鶯

再酬得臣

何處籠街引旆旌老翁高臥聽雞聲看花強起尋章曲
謁帝空思入大明有興時彈流水調無情懶賦麗人行
青春別我誰為伴只有能歌綠樹鶯

再酬得臣

隨緣南北似風旌飽聽波濤處處聲今日園花風裏盡
到時江月雪中明雖無格磔鉤輈語尚有嬾姍勃窣行
九江春晚
尚有遊人誰餞東君沸歌管琵琶絃上囀春鶯

奉酬晁強伯見和曉晴長句

元祐文華揭綵旌金沙別乘有家聲天教雲彩歸何處
詩共晴光欲鬪明已閤山前山後雨尚堪水北水南行
不應文石班中客肯伴韋郎賦曉鶯

章蘇州樂府
有聽鶯曲

奉酬晁元采三和前韻

見賢殊未駐干旌叩戶先聞剥啄聲春去鳥啼千樹暗
雨餘花落一窓明新詩已得前人法病足惟追逸驥行
何日長安君得意著鞭門聽上林鶯

曹度堅待制罷帥成都歸江南以川中唐人六
十家詩見遺作長句為謝

三月瞿塘峻江水萬里歸來蜀都帥盡收五十四州書
畫舸連檣當歌吹有唐文士幾千人文不逮漢詩則異

開元天寶光焰長長慶元和殿唐季化入寶奩脂澤中
亦有風滿有能事六十餘家三百年天遣遺風未全墜
青衫昔日同舍郎老傍人間百無意將焚筆硯技輒癢
未說風騷心復醉公堂許我能篇章遺以斯文慰憔悴
徒令後學羞捧心誰與前賢共聯轡為公隱几抱殘編
聊伴青奴問朝霽

雨中讀韓致光詩偶池上鹿葱盛開因效其體
曲欄干外水平階池上朱扉繞翠苔燕子飛來人不到

鹿蔥花在雨中開

題小扇

小扇題詩墨色新
碧紗囊裏剪藕絲
勾月團常在
纖纖手不用流蘇拂暗塵

池蓮初著數花

數枝臨水見纖娥
新採紅藍染襪羅
傳語薰風莫吹去
且容留眼看微波

富水軍治有巨澤
往歲荷花滿湖郡
守歲取荷

葉可買百千一日曝之湖濱大風吹卷飛數
十里頃刻俱盡又採葉者頗以為苦瀝膏油
以毒之逮僕至閱兩歲無一花今年結茅於
此穴小池植數十根而花已可觀因感前事
遂書之

湖邊老守湖是家湖光十里蒙寒沙我來不見花如錦
但聞荷葉飛天涯小池今無十許步晚雨亦開三數花
人生樂事無多少可意應須隨分了

題呂伸友寓安堂

事非昨夢本來空正在黃梁一熟中到處隨緣是安樂
人生何地有窮通飛衣不對東風舞霜葉空憐醉面紅
只恐他年終未免傳家重說小申公

剪松毛小柵以詩落成

東堂坐翫遭炊蒸西簷烈日方騰騰炎官張傘火漸熾
烏豕渡河雲不興五官大夫有遺種十八公自分雲仍
義和揮戈不可却郢匠剪毛歸作柵南風颭瑟出餘韻

怒龍奮迅蒼髯昇香來鼻觀過一雨便恐冰麝終難勝
天公割此一席地付與老翁來曲肱何時快著短齒屐
信手自把南山藤臥聽松風滿山雨去作水邊巖下僧

五月二十四日晚雨忽晴浴罷獨臥池亭雲峯
奇峭既夕方散

長虹截天雨初斷孤日翻光上銀漢忽從海底出三山
就中蓬萊正奇觀黃金塗闕射日光白玉飛欄入天半
青童舞女各娉婷手執雲幢影凌亂想得神清洞府君

應榜春皇侍香案群飛白鶴徒爾為化作蒼狗何勞看
神仙出沒不久長碧落天宮豈容玩荆王曉夢只須臾
神女乘鸞逐雲散人間幻化無不爾空復欵欵一長嘆
老人假寐忽舉頭但見明星光有爛

五月憫雨頗聞饑民弄兵於嚴衢兩州間三十

韻

長天望油雲槁黍待甘霖一雨有豐凶死生分旦暮頗
聞兩州民巖谷多嘯聚有司幸眼前白對急追捕斯民

如嬰兒慈母仰調護豈容使之饑而反貽以怒救饑當
未然為食須早具不雨三月餘開口久待哺岳牧事邀
游傲晚曾莫顧遂令出偏師徃徃勤遠慮人亦甚畏死
階亂豈無故漢有大司農為國最知務誰知部使者出
納反堅固輸金買朝糧僅得烏一喙尚爾吝弗予民隱
獨何慙幾何不為盜悔過苦無路富兒家多金封財亦
良裕積金謀子錢切骨被疽蠹閉糶不肯售叩門如蟻
附貧氣生一時萬死有不懼政坐守宰癡申令苦不素

有時出萬斛官為復常賦大或旌義閭小或賜朝醕民
情非木石豈不遵勸諭歲事小不登彞倫坐成數無良
二千石萬事成繆誤況乃六月師金甲困暴露天道有
報施人情均好惡會當明誅賞典刑正王度庶幾令遠
氓因此出沈痼

祁居之見過僕出未歸明日作二詩為謝

家近平湖草樹青幾年於此寄高情有時亦為衰翁出
誰道龐公不入城

不見前賢畏後生一聞君語為心傾何時却約高軒過
重聽門人說老成

初寬字居之和靖門人

雨後極涼簡竹坡四君子

江城夏六月大旱草木黃稽首文殊師駕言天池陽為
乞一斗水普救千里傷微雲生寶髻法雨過大荒霈為
一尺霖化作三日涼老人不耐暑內熱煎中腸吹以碧
落風灌以甘露漿我有方丈室彩牓名妙香呼我四君
子聊與之徜徉朝憑共烏几夜宿同方床永結無情歡

此樂殊未央
榮瘁不改觀
死生知有常
豈不賢俗子
與世隨
低昂翻手覆手間
此道寧久長
願我四王友
永言不相忘

七夕

并序

七月七日與客語七夕事因記葛稚川神仙傳載王方平會麻姑真仙於蔡經家事甚怪以謂自古詩人辭客必因風露淒清之夕而叙牛女相見之期凡援筆而賦七夕者皆托

兒女之情以肆淫媒之言瀆鱗天星無補真
教使人間異事泯默無聞良可痛惜因律稚
川之文而為之歌以廣其傳云

七夕相逢說牛女晉魏以來傳樂府金冠玉帔照靈河
不見此身聞此語何如當日兩神仙空中一別五千年
五龍駕車各異色萬里乘雲來九天麻姑女子十八九
青絲作髻爪為手擗麟薦酒進行厨撒米成沙只一時
為言東海將揚塵蓬萊水淺

闕

蔡經得道心尚凡

背痒自速方平鞭上界真仙足官府牛女之說真茫然
綵樓對月誰家倩更就天孫乞針線何不苦學麻姑仙
養取紅顏如玉爛

僕所居蓋濂溪先生之故基也有井清甘而寒
為之銘今未暇也

山下清泉古甃寒百年誰為發幽潛可憐昔日供茶鼎
曾與先生當谷簾

夢行西湖梅花下

久把西湖作故鄉至今清夢到湖傍
分明昨夜經行處
一色梅花十里香

春雲收盡忽斜陽夢裡梅花帶雨香
却上小舟誰是伴
回頭只有櫂船郎

太倉稊米集卷三十八

欽定四庫全書

太倉稊米集卷三十九

宋 周紫芝 撰

詩三十六首

食芡有感二首

雞頭子熟客新嘗
流落空嗟各異鄉
紅線綠荷香裏夢
十年燈火記錢塘

翻香引睡一胡床
剝芡尋詩度日長
若得長閒了無事
人生如此亦何妨

書祁居之家小閣

李渤築長堤三千五百尺為我絕平湖
遂識柴桑宅高人淡無營小室自生白
倚壁橫兩床並坐可四客時聞蒼蠅館
不厭蝸牛馘誰知湖尾山抱負縈水石
繁陰庇芳姿收拾在几席天地本高明
胸次有寬窄固應世外境頗與俗眼隔
我欲為君留雨意良霖霖對眠分小窓
夜語要劇會須臾攜被來更待風雨夕

次韻都倅題趙松老竹澗聽雨亭

西來倦客厭飄零一見宗枝眼為青世事絕知塵外少
雨聲更在竹間聽鏗如曲奏江邊瑟清伴風鳴塔上鈴
想得荊州都別駕詩成幽夢曉初醒

曉雨用都倅韻

亂敲簷瓦曉初零聲入孤燈影半青枕上有詩因雨得
窓間無客對床聽翠光洗出山千疊金色添成菊萬鈴
收取新涼歸酒盞莫將雙眼為愁醒

金鈴菊又名萬鈴

夜雨再用都倅韻

半世常愁夜雨零斷腸無復鬢絲青又將船艫舟中夢
移入梧桐葉上聽涼吹漸欣歸枕簟好詩那更似鶯鈴
欲知多少江湖興病眼無眠徹曉醒

夜聞驟雨枕上二首

星斗闌干雲翳銷黃昏猶未有微颿誰將枕上三更雨
捲作錢塘八月潮

山南未作小裘裊坐想奔流萬壑雷二峽橋邊風雨樣
先將此識入詩來

季夏極暑正晝草木俱萎獨吾坡上數君子玉
立蒼然傲睨自得豈杜少陵所謂脩竹不受
暑者乎

烈日當正晝長天無一雲草木失顏色歲蕤困燒焚陽
春始用事庶類爭芳芬小草最無名羅生費鋤耘凡花
頗矜持隨風弄餘薰一朝值炎酷爾輩徒紛紛蒼蒼不
改操惟我坡上君脩莖粲碧玉茂植歌屯雲有如獨醒
人不受麴蘖醺如彼至人者自與世俗分入火且不熱

况乃逢朝昕小人柔弱姿難與君子群

送吳甥歸秣陵

人生良苦不自知三折肱乃成良醫老夫年少不知此
請為甥也今言之平時頗喜詩有味晚乃竟坐寒無衣
人言詩成本無用小技止可持自怡一聞斯言寢不寐
盡欲棄去無孑遺人皆見之唾不顧汝乃掇拾歸何為
前年行都子訪我值我偶得南州麾汝之老母我伯姊
何為棄養行相隨極知饑寒子良苦况乃窳窳歸無期

翁今兒孫漸滿屋子六八女肩相差歸囊羞澁止有此
世事乃爾真成癡渭陽老將如病驥肉瘦到骨那能肥
枯其成豆不足較甥也幸有驂駟姿丈夫豈合長貧賤
慎勿瑣細含酸悲天寒霜勁路如掌矯首一望秋風嘶
小兒琴歸自宛陵喜甚成詩三十韻

吾家自曾高善積豈一日爾祖工辭章論議抱經術我
亦學弓冶少小弄文筆汝兄今有兒束髮行授室義方
稍加訓書種恐未失汝亦千里駒似有跼蹐質頃為國

子弟兩戰一敗黜猶復勝端舒不識六與七胡為久別
離嘉月六換律去時春氣溫飛燕如點漆只今秋風高
露草鳴蟋蟀老眼望千里懷抱難盡述有時坐如癡經
月髮不櫛酒酸或忘飲客至亦懶出汝書江南來歸計
似可必翁也望汝懷疑有后皇橘奴婢喜欲顛精粲治
黍秫辛勤釀斗酒待汝解憂懷訪舊說鄉閭呼兒共梨
栗念汝童稚時頃刻不去膝況今待汝來時序恐凜凜
竹輿聽唧啞雲嶺走羣律吾無千金產遺汝使汝逸惟

有翫陂文待汝成卷帙二事倘可了餘亦遑暇恤是時
新堂成小室頗溫密夜席照寒燈紅爐共咕嗶皇天既
休老謝事即移疾汝當著歸鞭快馬追健驛

次韻郭元壽泊舟琵琶亭下夜聞吹簫

舟在琵琶舊日亭玉簫更弄月微明湓江故事新歌曲
便是香山此夜情

次韻元壽見贈

畫簷橫著小闌干看盡西來最好山帶雨楚江依約處

隔烟淮樹有無間已煩造物分幽趣合就餘年了燕閒
借使眼前無此妙可能不似鳥知還

送元壽歸華亭

念昔得左魚相逢各萍梗我方事米鹽君亦厭簿領豈
曰吾無徒其實但弔影殷勤共杯酌邂逅得俄頃坐中
老於菟神色甚凶獷一軀垂豕腹兩眼張牛猛酒行殊
未闌幽事頗遭梗人生聚散多快意復難逞只今幾何
時我居已深屏君亦乘歸舟久別勞問省長言出新詩

小酌共晝永平生發硎刃妙割無肯綮豈容金九傍臥
著函牛鼎廟堂重汲引盡取無短絆會當從隗始豈復
雜噲等願君飛尺書早發慰晚景功名要激昂人事勿
暖冷為我謝黃郎無路勤造請熟醉倘有味高卧不須
醒仍煩織筠筴丹砂寄圓頂

華亭出鶴

都倅壽詩

讀盡人間未見書幾曾回眼到園蔬文章筆下飛雲錦
今古胸中著石渠萬事要詢胡伯始九重應問馬相如

明年我欲為公壽想得追鋒已賜車

文石班中侍從聯如公真合在甘泉何由魏闕催歸詔
未到荊州去路邊分外寡求應是福靜中有壽不須仙
滿斟玉色長生酒爛醉廬峯五老前

晚眺

望極應千里人家自一村客帆何處落隣碓隔煙聞山
自秋來瘦江從雨後渾平生幽獨意為客却銷魂

九江木犀甚富而香亦奇絕江東所無也

自從春去憶疎梅直到秋來數木犀不隔幽香微雨細
偏宜小樹夕陽低無詩可說難言態有酒應須著意攜
家在東江苦無此莫嫌為客在江西

再賦木犀

新詩幾欲賦幽姿才淺真慚禿角犀未可使教金粟盡
直須看到玉蟾低風吹香去天誰管花趁人來我自攜
不對此郎時一醉空令墓上揭征西

再賦木犀

尋香剪得耐寒枝不羨腰圍寶帶犀塘桂自應同臭味
巖花未可較高低秋風易老空成恨佳客無人莫漫攜
挽取芳條供燕坐絕勝騎馬號安西

謝祁居之惠桃竹杖

老翁年少白如玉初學裏頭雙鬢綠一心走覓梨與栗
兩脚登山健如鹿中年脚力驚早衰騰蹕安得如兒時
挾弓持滿走避賊尚與箭鋒爭疾遲如今老矣那忍說
七十上身頭似雪年來脚力何所似鈍如罷牛跛如鼈

先生強欲相扶持贈我江心桃竹枝竹夫人癡不解語
木上座肯行相隨況乃柴焰如削鐵四十九層排玉節
天公與我山作堂木落霜空秋九月與君共看南山雲
安可一日無此君

十月十七日大風約客登虎渡亭觀浪人言今
日下水風不可往也戲作此篇

長江水自光搖空陽侯欲與風爭雄濤頭不受水犀弩
鯨波欲卷馮夷宮徑須便入虎溪口淨洗平吞雲夢胸

人言上水得風浪下水得風終少功平生萬事盡難偶
政要東風渠不東江邊一嘆良細事而亦齟齬煩天公
兒時望事到白首事不如意十八九不如快飲風流泉
夜看青山街北斗

送楊師醇赴竟陵法官

平昔交遊未易論世間誰復似君真五花判事元無意
三尺從官政為貧酒賤頗宜呼客飲詩成莫忘寄書頻
使君若向新堂老今是開山第一人

時二妙已成
故有是句

次韻楊師古留別

寄食客鄉遠誰人肯見過江山來往數蘭王弟兄多可
恨澆愁酒能摧轉棹波幾時書到眼此別意如何

晚思

灘沙露尾江水乾江洪束峽江流湍千山落木風轉急
萬里飛鴻天更寒暮雲政擁蒼玉玦落日忽下丹砂盤
他鄉久客去未得悠然東望心悲酸

二妙堂望九十九峯雪

北風卷地天漫漫長空下舞十翔鸞天公吹絮作飛雪
大匠琢玉成群山群山南來西北折走如連環斷如玦
接天朝同一色雲映水夜伴中宵月誰知三千大千界
有此九十九峯雪人間未見固難名天上有之那可說
老夫才盡晚益繆筆力應無此雄傑徐熙著色豈可畫
大年小景不足悅誰當貌此一段奇留與高堂洗炎熱
雪後步至江亭

老人攜家無窟穴晚得一邱藏曲折今朝日出天色佳

拄杖來看山頂雪青山疊疊幾十峯桃竹班班三百節
山晴顏色看轉好老健脚力殊未竭出門暮色尚餘霞
步到江亭已生月歸來附火却關門茶熟詩成意良寬
客有勸我勿作詩奈此江山兩奇絕捫鬚仰面看屋梁
心自知之口無說天將此段付詩人世間那有閒風月

時宰生日詩五首

并序

某伏遇太師相公慶誕之日忝出鈞播之下
倍增欣悅之情屬官守所拘越在江表不遑

俯伏槐庭仰仲燕賀下情徒切依戀謹薰沐
撰成古風五首敢罄愚衷用祈遐壽竊惟太
師公相妙筭無前度越百代豐功蓋世焜耀
兩儀閱歲曾不踰於十稔而禮樂修明庶事
畢舉殊祥上瑞汗簡迭書樂歲豐年諸道並
奏至於鈞陳太微星緯咸若北岳醫閭鬼神
受職治效所臻曠古以來所未嘗見往者愚
不自揆固嘗屢草蕪詞上塵鈞席既而思之

太虛難於繪畫芻狗不可再陳姑且置之不
復敢道獨以謂大賢君子間世乃生民之休
戚實係於斯非若鳳皇芝草徒為美瑞而已
故一章以記誕彌之慶爰自上世以逮中古
相業相輝具載信史固亦多矣大率不過好
生惡殺以不戰為勝以銷兵為上太師公相
深得聖人好生之意以就神武不殺之功故
二章以明相術之要位莫隆於三公功莫盛

於姬旦圮上之書授之子房謂當為帝王師
而其功業甚卑未能去殺不足彷彿今日之
盛然則非體伊尹格天之德安能踵周公既
醉之風故三章以述盛德之效功高者位必
大德盛者慶必長今少保大觀文道德文章
為世儒宗韋平之傳鄭武之詩不足少進流
芳千載何有窮極皆盛德至仁天為之報故
四章以卜累世之休仲尼執魯國之政歸齊

人之疆當時之人號為聖相休兵而來生民
奠枕方之聖相無少愧焉然魯國之地不足
以比大統之宋歸疆之效未能成極治之隆
功高位大無以復加惟有持盈守成可以上
迪吾君下濟斯民以永無窮之休是為天下
之公願故五章援聖相以明大功凡此五者
雖不能事載其目物彰其美而不世之勲難
名之妙實在其中矣伏惟太師公相益廣好

生之德用昭不忍之心使薰然慈仁足以轉
一氣於洪鈞開八荒之壽域則天心克享壽
亦無窮某猥以庸才久陶大化敢忘僭冒上
瀆威嚴伏惟鈞慈俯垂采覽不勝榮幸之至
皇天產萬彙瑣碎不足名青黃百草中幻作芝九莖惡
鳥不敢語紫鳳丹霄鳴尤物倘或出四海稱隆平太史
上圖牒后夔奏謏謏豈知人中瑞千載乃一生神高下
蒼籙昂宿扶漢氓天亦甚愛惜殷勤遺黎乳聖主答天

意一酌尊老成願公於斯年擁佩朝玉京

二

歷世由義軒百相標簡牘操術難具論大抵一言足所
尚必仁恩所禁在殺戮臯陶期無刑四海自肅穆敦德
益所贊坐使有苗服西都郅支功蕭相不肯錄有唐未
開邊宋璟乃當軸向來多謬悠紛紛空食肉一言俞王
音萬竈休野宿不戰乃為功休兵豈無福

三

維國有六職論道先三公巍峩獨姬旦焜燿傳無窮子
房號賢傑妙筭無遺蹤謂可為帝師授書圯上翁周公
遜太平道與時適隆張侯策雖奇未解銷兵戎太師回
狂瀾僅在談笑中德業與智謀誰能與公同疇人亦何
知但說前無功誰知公一德自與天潛通

四

種木當培根疏流必深源嘗聞活萬夫報在子與孫只
今父子懿同拱羲皇尊文方班馬富業與臯夔倫奕奕

兩貂蟬煌煌一朱門聖道家所傳蘭樹俱有聞韋氏守
一經事業不足論金張誇富貴盛德無遺芬父師固難
量有功在元元為公祝遐壽千載同風雲

五

魯人用真儒齊田歸鄆謹當時號聖相晏語甚昭煥往
者遭承平燕安嗟久玩三綱既已解四海兵幾半天戈
不忍揮燕騎忽雲散功高陋古今事易止朝旦方知今
相聖難復與魯辨世罕班馬流無言可稱贊願公守成

勲寶歷慶千萬蕪詞不足錄至意良可獻

客有以僕託病謝客者甲戌除夜作

夢中七十四番春謝客明年懶見人已是天公憐我老
苦無官長怕誰嗔臘隨殘漏聲俱盡鬢共疎梅色鬪新
招取雲山來一笑竹坡猶有此閒身

祁居之作亭山間名之以宜謂四時之皆宜也
其後寓安有亭未名居之使榜以似宜寓安
雖從之而其詩乃有未必輸公之語氣似未

平也寓安欲余賦詩因為解紛且以見二公
相忘之意

先生有亭宜四時乃使寓安名似宜寓安口諾心未肯
更欲老翁聊決疑老翁百事盡稱好一生和羅常作樵
况是宜亭頗靜秀聞說似宜尤復奇兩山相望俱不惡
二老較勝知何為會當扶病躡雙屐攜酒君家為君醉
不知春事已過眼但見此亭俱可意且對青山食蛤蜊
一笑誰能知許事

晚霽效韋蘇州

重霧翳曉日相持決陰晴須臾忽戰勝日杲中天明積
雪壓竹腰欲舉如垂旌永凌既融液意氣還崢嶸花木
手新植未可分死生庶幾僵仆根可與微陽爭况乃田
畝間春事亦漸營新綠染麴麥餘甘歸竹萌飽食遂可
料聊助春山行一晴亦細可繫我憂喜情我詩不浪作
有詩君勿輕

寄題章漢直中虛堂

谷以虛而應樂以虛而出婦姑時勃蹊作室坐自室天地猶橐籥用固不能屈學而不見道方寸等暗室誰知道集虛通一萬事畢推此以遊世於道乃其一異哉子章子妙悟造理窟何止學美身虛靜了不汨願君師心齋守此能勿失室以虛生白水以止鑑物此意似太漫未免遭罵詈我亦取斯言聊用自湔拂

太倉稊米集卷三十九

欽定四庫全書

太倉稊米集卷四十

宋 周紫芝 撰

挽詞三十四首

徽宗皇帝挽詞二首

治格興王日功垂定鼎年重新周制度盡有漢山川寶
墨星辰爛皇猷典誥傳小臣回老眼垂泣望雲天

二

主器歸儲嗣神堯意獨高帝方遊赤水人已抱烏號萬

國瞻雙闕三山戴巨鼇思陵風雨夜松柏漫蕭騷

吳師魯挽詞

少日詞華豹一斑暮年白髮老青山誰知筆下三都賦
不及人間五兩綸麟閣未輸前日恨鹿門長享百年安
他時隱逸書佳傳名在宗元李孟間

唐隱士吳筠
謚宗元先生

王夫人挽詞

藁砧高義赫窮閭內子宜家協鳳占茶乳未容收淨供
蛛絲早已上香奩坐中有客思分髻林下無人解擬鹽

他日諸郎盡臺閣會刊佳傳賁幽潛

徐夫人挽詞

蚤歲孀居婦職修凜然霜檜與爭秋
木蘭女解聽金柝共伯妻能賦栢舟
鸞誥一封身未享木奴千樹子先侯
可憐黃壤埋瓊玉十里虞歌滿路愁

郝至之挽詞

不見平生郝翫山滿襟青淚只潸然
少時挿架空千軸老去看囊止一錢
挈榼暗思攜酒處跨驢誰畫作詩肩

當時刻鵠終成鷺唾面應須使自乾

哭劉元素

前度劉郎跡已塵交親零落倍傷神
桃花句好人何在忍看風搖燕麥春

日飲無何自醉醒平生種種是真誠
不須私作門人謚君亦從來苦畏名

中郎已老元無子靈運為僧只在家
斗酒隻雞吾欲哭不知誰為作侯芭

劉元亢挽詞

交遊半作白頭新不見劉郎誰與親
東野命窮官止尉少陵才健筆如神
皇天可是無公道舉世何由有若人
醉裏廣文渠不識可憐官長錯相嗔

悼友篇

王次卿

建炎三年冬朔騎方南驅王師一敗績
列戍如驚鳥賊將招叛亡操戈橫道隅
坐令江鄉地化作盜賊區平生金蘭友
之子真吾徒避地出三物夷險兩不渝
豈謂倉

惶間遂有生死殊始時群盜來未識安所趨但聞憂金
革門外爭喧呼捫蘿得微徑密雪方紛敷子時索我急
出門衝賊塗遲子久不至得報日已晡夫婦俱見執擔
簷入軍俘纍纍五兒女飲泣聲呱呱小雛從物故踉蹌
走大雛長女留軍中繼釋二小妹藉草已信宿脫死許
可圖賊意欲解縛小試聊躊躇時方羽書至招諭陳嘉
謨渠姦立授辭抗論苦未俞命子使草檄操筆徒嗟吁
謂言不事賊高目捫髻鬚丈夫賤苟活請就斧鉞誅袒

裼蒙殊死肥白驚瓠壺其妻始就擒抱子俱沉濡牽挽

負殘息凍凌

去聲

生羅襦時方燎濕新四座圍諸孤可憐

玉雪姿不受蛇豕汙須臾有健卒提刀血模糊聲言殺

藁砧憂憤攪鬱紆撫掌發浩嘆隕越不復甦夫義婦亦

烈此事知久無自古肉食者未必非姦諛生無骨骸資

含死餘金珠石麟高差我豐碑樹龜趺生無征戰功祁

連巧規摹誰知草棘中高義屬豎儒蔡琰既兩聘生子

留單于晚歲遭阿瞞愛惜存微軀尉宗作佳傳浪與烈

女俱世無採詩官盛事恐湮蕪子死不足惜會當逢董狐

詹伯尹挽詞二首

詹友端字伯尹

詹郎胸次有奇兵幾為樓蘭欲請纓四海眼高空燕雀
百年身老困鯢鯨跼鳶不用傷遺恨蒼狗何嘗有定名
勲業轉頭渾似夢却將五字作長城

平生危論劇傾河應合飛騰上諫坡富貴腥羶真夢耳
死生名節奈君何欲求佳傳無千斛但把青魂付九歌

斗酒淋漓澆宿草西風老淚不勝多

吳夫人挽詞

懿德閨房重高名遠近稱流年忽成夢素節尚如水法
悟無生忍禪參最上乘應憐女博士空近讀書燈

二

素幔秋風急烟峯曉日殘香沈金獸在鏡掩玉臺寒思
已霑封誥人空委珮蘭他年作佳傳誰為考幽刊

李卿挽詞

李侗字誘衷

東漢埋輪手開元御府卿名因射策早恩許故家榮竟
失鵷行舊空乘馬鬣旌他時雙驥子萬里足歸程

桐川太守母夫人挽詞

夫人無復擁魚軒旅櫬歸來倍黯然
皂蓋朱轡今有子布裙椎髻舊推賢
餘哀盡入虞殯曲盛事當隨列女篇
忽掩幽墟可無恨誥封生享更高年

哭吳與行二絕

吳時字與行

李廣平生竟不侯功名看得鬢霜秋
學無西洛時難偶

人似南金價未酬

投筆文場日未西
春蠶食飽速於飛
充庭不是無前列
從此元江九肋稀

聞侯元進死

薄宦時難得餘生老易分
人言侯叔起詩學鮑參軍
未補胸中線空修地下文
欲尋高密語應怕虎狼羣

二

君在漳溪病相逢特地歡
句新詩屢出談劇酒頻寒夢

作三春別人成隔世看無由弔塵凡只有涕闌干

悼舒永豐

舒賓王字利用卒於信之永豐令

舒侯九秋鷹未奮老拳翼平生流輩中肯數程不識庾
公開幕府少作九江客風簷掛虛樓夜月浮大白飲氣
吞江流高談傾坐席一朝風塵暗孤壘困劇賊艤舫浮
江下雲霧蔽天赤坐中喙角兒相視無人色手持白羽
扇奮身追危壁坐解兩家難稍稍無勍敵身幾落虎口
名不掛賞籍鳥去良弓藏論功止投石歲晚猶折腰得

邑亦甚僻似聞山中人盡飽太邱德官謗殊未明此責詎
可塞乃復令斯人含恨入窀穸風亭分客袂僅作秋夏
隔奪我玉面郎江湖坐愁寂撫棺欲三號何由反鄉國
元具茨不起道州之疾哭之以詩

元勳字不伐

一別魯山三歲餘西來消息未全疎白頭忍雪春陵涕
闕醉纔乾廬阜書晚路得州真似斗平生彈鋏竟無魚
漫郎猶有新書在千古風流不負渠

沈貴池挽詞

沈肇字彥述

澤宮當日喜逢君雞鷺初驚鶴在羣果見廉平清似水
不嫌名宦薄於雲一區未買江邊宅三尺誰澆隴上墳
自古達人俱泯滅固應知有沈休文

李使君挽詞三首

李彥卿終於宣守

治劇知公老更優何嘗箕斂急征求誰言粟自關中漕
但見錢從地上流已報南來三日政為寬北顧一時憂
皇天自古無公道不遣劉郎到白頭

溪頭萬杵鄉音春雷談笑爭看雉堞開鼙鼓不須催畫

急麗譙疑復自天來一樽誰酌風前酒萬柳空垂雪後栽
魯史書城三十六不殫民力獨公才

使君投老益精明三換魚符寄一城漢相未曾除郡守
蜀祠空復拜諸生他年宿草人誰弔當日清泉我作銘
萬里巴江消息斷不堪斜日上寒旌

蔡氏夫人挽詞

夫人蔡天啟之妹

中郎文采照當年婦德尤稱女弟賢長夜忽成三尺隴
異恩來自九重天名留仙籍誰能見事載銘詩世謾傳

想得伯鸞懷舊恨摩挲浮歸櫬一潸然

方桐川挽詞

懋德守九相

善人淪沒意如何細說平生恨轉多此日飛騰只蘭省
當時準擬上鑾坡十年猶記燕姬舞一曲今悲鬼伯歌
欲問哭君多少淚未能注海亦傾河

周脩武挽詞

懶隨車馬著冠裳便築華堂作醉鄉遮眼不知山幾疊
供閒自有木千章平生陰德應無數他日高門未可量

我亦元無諛墓手斯文聊付起家郎

弔孫雲老雲老少年謝去場屋詩甚高而豪於

飲

孫郎涉世似虛舟一醉從前萬事休千佛經中無姓字
八仙歌裡見風流清詩便與重泉隔客淚空添晚歲愁
隴上只今多宿草為君何地築糟邱

哭二羅

靖仲共

疎叔共

平生交友懷三益晚歲悲酸弔二羅地下忽埋雙白璧

人間真是一南柯
篇章零落知誰管
人物風流竟若何
未有隻雞澆斗酒
空令老淚作傾河

弔陳相之侍郎

疇昔相逢十載餘
已驚白雪鬢疎疎


臨安初見公年才四十餘鬚鬢俱白

長鳴本是空群馬
入社猶為漏網魚
醉到湖邊誰共酒
別來江上苦無書
風流文采今何在
只有傾河淚滿裾

相之詩甚工而名不在江西詩社中故有漏網之句

九道江中弔趙溫叔

昔飲江南酒劉郎鬢未華無依憐晚歲死賊痛全家夢
隔泉臺久魂歸故國賒與誰山下路同折凍梅花



太倉梯米集卷四十